

四庫全書

集部

欽定四庫全書

宋元詩會卷七十一

兵部主事陳焯編

姚燧

字端甫其世系見樞傳燧生三歲而孤育於伯父
樞年十三見許衡於蘇門十八始受學長安二十
四讀韓退之文欣然有得試習為之人皆謂有作
者風閒就正於衡衡亦賞其詞但戒以務韜晦勿
為名高也年三十八籍秦王府文學未幾授奉議
大夫提舉川陝等路學校凡三奉命使蜀皆稱職
至元十七年授漢中道提刑按察司副使調山南
湖北道按部澧州先後以明決著聲二十四年為

翰林直學士又三年授大司農丞元貞元年以翰林學士召修世祖實錄大德五年授中憲大夫江西廉訪使大德九年拜江西行省參知政事至大元年召為太子賓客除承旨學士尋拜太子少傅辭不受明年授榮祿大夫翰林學士承旨四年得告南歸明年卒年七十六諡曰文所著有牧菴文集五十卷行世按姚牧菴有逸事可紀者當為承旨時翰林公譙歌妓羅列中有一人微操閩音舉止殊衆牧菴心異之問其履歷乃建寧人真西山之後也以父賈朔方折閱賣入營籍言訖流涕不已姚遂詣丞相三寶努求為落籍俾小掾黃球娶之資遣甚厚而嘉興貝闕作詩詩無足觀因其事以傳遂得附見

姚嗣輝南檣堂

彼檜有土性生植惟我岷
樂樂干雲姿才與樗散隣
匠石過不睨煬夫取蒸薪
所貴故山樹寧計世莫珍
一別十畝陰清溪俄幾春
筆名堂楣上如對故鄉親
請事小弁詩桑梓亦惟宙
盛德古自卑木惡何關人
不見樗里疾智囊終相秦

舟達黃溪

草木隨寒暑殊方榮悴同
葦華魚露白檉葉未霜紅
日月雙飛鳥江湖一病翁
晚來沙嶼上愁坐獨書空

發舟青神縣

青神開百丈江岼轉荒涼辟荔緣松起蕙葭並竹長深
披豺虎徑毒犯虺蛇鄉何莫非王事牽夫可惋傷

感事

致位丞疑地夔龍伯仲間星當朝北斗日已薄西山取
謗因讐惡貪權失丐閒此行雖鐵甲未足比慙顏

輿病高座道中

役役乾坤遠栖栖道路頻五年三入蜀十夢九歸秦瘡

鬼偏凌客山花定笑人
毋勞問前渡祇覺白頭新

癸丑九日

去歲君山孤櫂遊如今盡室石城州
明年白髮桑榆日何地青山萸菊秋
客氣已為強弩末宦情空遶大刀頭
果成問舍求田策未讓元龍百尺樓

宋陸秀夫抱衛王入海圖

紫宸黃閣共樓船海氣昏昏日月偏
平地已無行在所丹心猶數中興年
生藏魚腹不見水死挽龍髯直上天

板蕩純臣有如此流芳千古更無前

貝闕附

贖難女紀事

斷絲棄道邊何日緣長松墮羽別炎洲不復巢梧桐昔
在至元日六合車書同玉堂盛文士燕集來雍雍金刀
手割鮮酒給蒲萄濃坐有一枝春秀色不可雙叶娉婷
劉碧玉倬約商玲瓏寶釧金雀釵已覺燕趙空或聞操
南音未解歌北風上客驚且疑姓字初未通問之慚復

泣乃起陳始終妾本建寧女遠出西山翁父母生妾時
謂是金母童梨花鎖院落燕子窺簾櫳迢迢旅朔方貧
盡食不充稱貸忤富人桎梏加父躬鬻女以自贖白璧
淪泥中秋娘教歌舞屢入明光宮永為娼家婦遂屬梨
園工京華多少年門外嘶青驄不如孟光醜猶得嫁梁
鴻自傷妾薄命失落似秋蓬客聞為三歎天道何慚慚
遣使白宰相削籍歸舊宗小吏十八九勿恨相如窮配
爾執箕帚今夕看乘龍鴛鴦並玉樹鸚鵡開金籠棄汝

桃花扇紅牙不復從提瓦自汲水絺綌自御冬時多困
輶軒事或欣遭逢安知百尺井忽登羣玉峰借問為者
誰內相姚文公

李兩山

至元間官禮部侍郎見陳孚詩同登憫忠寺閣兩
山其號而名不傳元音及體要二選中所稱謂彊
半如此非有別
考亦姑仍之

鬻孫謠

白頭老翁髮垂領牽孫與客摩孫頂翁年八十死無恤

憐汝孩童困饑饉去年雖旱猶禾熟今年飛霜先殺菽
去年饑饉猶舖糜今年饑饉無餘粟客謝老翁將孫去
淚下如絲不能語零丁老病惟一身獨臥茅簷夜深雨
夢回猶自誤呼孫縣吏催租正打門

信州糧謡

信州糧糧何艱十鍾一石萬里間朝發錢王隄暮過嚴
子灘舵尾白浪如銀山朝渡蘭谿縣暮泊龍丘灣峻如
牽車上鬼關督吏持檄夜如箭布帆無風河水乾去年

糧船未及岼今年仍運八百萬只知欲救彼地荒不知浙東天亦旱禾黍今年收不足浙東又移何郡粟

趙孟頫

字子昂宋太祖子秦王德芳之後也家湖州幼秉絕慧年十四用父蔭補官宋亡家居自力於學至元二十三年行臺御史程鉅夫奉詔訪遺逸于江南得孟頫以之入見世祖顧之喜使坐右丞葉李上龍任日隆將欲大用議者以宋宗室故難之授兵部郎中遷集賢直學士時丞相僧格網利害民無敢言者孟頫因地震與諤爾根薩里籌弭天變必大赦天下盡與蠲除而後可諤爾根入奏一如所言帝從之民始獲蘇至元二十九年出同知濟南路總管府事遷知汾州未上有旨留書金字藏經

除集賢直學士提舉江浙儒學延祐元年除翰林
侍講學士遷集賢三年拜翰林學士承旨仁宗眷
之甚厚以字呼之六年得請南歸
卒年六十九追封魏國公諡文敏

古風 八首

詩亡春秋作仲尼益苦心空言恐難託指事著以深大
義炳如日萬古仰照臨鳳鳥久不至楚狂乃知音愁來
不得語起坐彈吾琴

周衰有戰國紛紛蹈荆榛黃金聘辯士駟馬迎從人朝
為刻骨讐莫作敵血親終然智力屈奉身俱入秦

絕代有佳人，被服綺與紈。蛾眉秀聯娟，吐詞馥若蘭。清歌啟皓齒，瑤琴發哀彈。一彈再三歎，聽者涕洟瀾。借問誰家子，為言本邯鄲。

秋風吹庭樹，故葉紛以墜。明月耿夜長，草蟲促經緯。四序苦不淹，少壯何足貴。展轉復展轉，寤辟不能寐。昔為閨中秀，今作市門鄙。豈無膏與沐，甘心待憔悴。

山深多悲風，日暮愁我心。玄雲降寒雨，松柏自哀吟。人生百年後，奄然閔重陰。念此每不樂，天路何由尋。仙人

倜儻輩逍遙在青岑奈何不爾思委命重黃金

海中有奇樹粲粲珊瑚枝由來植物性無脛可推移如
何石氏子樹之白玉墀洛陽經幾戰金谷久荒夷空令
千載下聞者為傷悲

烈風號枯條落葉滿周道原野何蕭索川流亦浩浩離
居日以遠懷思令人老功名會有時生世苦不早顧瞻
靡所騁憂心慙如擣

浮雲何方來不知竟安之飄飄隨風去汗漫以為期自

昔功名士往往事驅馳白駒空谷中誰能加絃維皎皎
難見容翻受世妍媸虛名誠無益不見斗與箕

歲莫和剛父雜詩

二首

驚飈吹白日流光忽蹉跎登山采衆芳荆榛一何多迷
途幸未遠迴車且委蛇黃鵠志四海雀鷄將如何

肥馬黃金鞍輕裘華且鮮竭來從橫馳意氣何翩翩朝
為人所慕夕已為世憐此道固應爾禍福非虛言生當
稱善人死當諡為賢勿羨夸毗子狂馳終百年

贈道隆上人

辟俗無所之步尋招提遊顏垣蔽蓬艾破屋壞不修老
僧俗念淨靜坐百不憂浮雲有逸態止水無急流乃知
我輩人苦受世界囚竭來得此地稍覺心休休窗前幾
蘂菊青蕊亦已稠愛之不忍采留作山房秋何當移四
松伴汝清謁浮南岡與北領路近頗易求他年風雨夜
來聽龍吟幽

桐廬道中

歷歷山水郡行行襟袍清南崖東滄江扁舟此宵征臥
聞灘聲壯起見渚烟橫西風林木淨落日沙水明高爨
衆星出東嶺素月生舟子櫂歌發含詞感人情人情苦
不遠東山有遺聲豈不懷燕居簡書趣期程優游恐不
免驅馳竟何成我生悠悠者何日遂歸耕

罪出

在山為遠志出山為小草古語已云然見事苦不早平
生獨往願丘壑寄懷抱圖書時自娛野性期自保誰令

墮塵網宛轉受纏繞昔為水中鷗今如籠中鳥哀鳴誰
復顧毛羽日摧槁向非親友贈蔬食常不飽病妻抱弱
子遠去萬里道骨肉生別離丘隴闕拜掃愁深無一語
目斷南雲香慟哭悲風來如何訴穹昊

題歸去來圖

生世各有時出處非偶然淵明賦歸來佳處未易言後
人多慕之效顰惑媿姦終然不能去俛仰塵埃間斯人
真有道名與日月懸青松卓然操黃華霜中鮮棄官亦

易耳忍窮北窗眠撫卷常三歎世久無此賢

慶壽僧舍即事

白雨映青松蕭颯洒朱閣稍覺暑氣銷微涼度疎泊客
居秋寺古心跡俱寂寞夕蟲鳴階砌孤螢炯叢薄展轉
懷故鄉時聞風鳴鐸

幽獨

獨坐不自聊披草尋微逕夕陽在高林籬落有餘映依
依增遠想歷歷生晚聽涼蟬軋鳴箏候蟲擊清磬大小

皆有從雄雌各相應沈吟復躊躇忽覺西山暝

題西溪圖贈鮮于伯幾

山林忽然在我眼攬袂欲遊嗟已遠長松謾謾含蒼烟
平川茫茫際曾巘大梁繁華天下稀走馬鬪鷄夜忘歸
君獨胡為甘寂寞坐對山水娛清暉西溪先生奇崛士
正可著之巖石裏數間茅屋破不修中有神光發奇字
綠蘋齊葉白芒生送君江南空復情相思萬里不可見
時對此圖雙眼明

烈婦行

客車何焯焯夫挽婦為推問君將安去言往襄陽戍官
事有程宿車下夜半可憐逢猛虎夫命縣虎口婦怒髮
指天十步之內血相濺夫難再得虎可前寧與夫死毋
與虎生呼兒取刀力與爭虎死夫活心始平男兒節義
有如許萬歲千秋事明主馮婦卞莊安足數

送高仁卿還湖州

昔年東吳望幽燕長路北走如登天捉來官府竟何補

還望故鄉心惘然江南冬暖花亂發朔方苦寒氣又偏
木皮三寸冰六尺面額欲裂凍折弦宦遊遠客非所習
狐貉不具綈袍穿京師宜富不宜薄青衫駿馬爭騰騫
南鄰吹笙厭梁肉北里鼓瑟羅妹妍淒涼朝士有何意
瘦童羸騎鷄鳴前太倉粟陳未易糴中都俸薄難裹纏
邇來方士頗向用讀書不若燒丹鉛故人聞之應見笑
如此不歸殊可憐長林豐草我所愛羈勒未脫無由緣
高侯遠來肯顧我裹茗抱被來同眠青燈耿耿照土屋

白酒薄薄無黨羶破愁為笑出輭語寄書妻孥無一錢
江湖浩渺足春水鳬雁滅沒橫秋烟何當乞身歸故里
圖書堆裏消殘年

孔道輔擊蛇笏

以笏擊蛇有孔公義與段公擊賊同事之鉅細雖有異
正氣憤激生于中偉哉孔公聖人裔豈聽妖邪亂民志
即今槐木一尺彊氣象凜凜含風霜子孫守之慎寶藏
絕勝象牙堆滿牀

春寒

夜雨鳴高枕春寒入敝袍
時光自花柳吾意豈蓬蒿
失色黃金盡知音白雪高山
林隱未得空覺此生勞

雪後同子俊遊何山

四首

同是清閒客俱為放浪遊
晴山依雪壯野水帶冰流
風急松杉亂年登薺麥收
生涯雖未老吾欲覓菟裘

步履行危磴憑闌得妙峰
鳥飛迷故道人去想遺蹤
掩冉風前竹支離澗底松
山僧飯不足不是忘鳴鐘

兵革時猶動山林日就荒子真思隱遁詹尹卜行藏有意隨三飯無人饋五漿遠山湖外白立馬見微茫

湍駛波翻雪風生地出雷薄醪隨意盡寒氣逼人來更欲明朝去何妨迫暮回自憐非李廣醉尉勿相猜

重遊弁山

竹色迷行徑松聲洶座隅水清花自照風暖鳥相呼飲罷思棋局歌長缺唾壺重來瀟洒地聊足慰須臾

次韻陳無逸中秋月食風雨不見

谿月當圓夜看雲起暮愁層陰連積水伏雨暗清秋白
壁難容玷明珠不可求每因觀節物轉覺此生浮

秋興

興逐秋風發愁隨秋夜長繫書陽鳥遠促織候蟲忙世
已無劉表家徒有孟光故衣寒未補發篋動幽香

送楊幼澄教授歸江西兼寄吳幼清

客裏相從久愁中欲別難此行登仕版未覺負儒冠北
度憐江總東歸憶幼安著書應滿屋妙處共誰看

送李青甫由御史出按四川

蜀道青天上繡衣
驄馬行霜威御史府
春色錦官城萬里
平安報三年菽水清
相逢一杯酒似為別離傾

食粥

杲杲西流日滔滔東逝波
春光薊丘晚柳色上林多
不道含香賤其如食粥何
明時無小補郎署漫蹉跎

和周景遠見寄

四海多兄弟交情子獨親
方將尋蛭螭何意畫麒麟
簿

領淹豪士江湖著散人相看俱老大喜見二毛新

謝日林贈湖石次其韻

怪石曾聽法來從不二門玲瓏浮磬韻斑駁古苔痕池
月巖邊上春雲水面屯微君能輒贈此意向誰論

胡穆仲先生挽詩

我有三益友對之如古人布衣甘陋巷書冊老遺民淚
落黔婁被神傷郭泰巾請為千字誄書刻上堅珉

大都遇平江龍興寺僧話唐綦毋潛宿寺詩因次

其韻

聞說龍興寺多年未款扉
風林發松籟雨砌長苔衣
殿古燈光定房深磬韻微
秋風動歸興一錫向空飛

次韻觀復表兄見簡

寒雨何時已停雲不肯開
難陪山簡醉空憶謫仙才
梅蘂枝枝發幽禽日日來
可能無過我真復要詩催

和姚子敬秋懷

四首

銅雀春深漢苑空
邯鄲月冷照秦宮
烟花樓閣西風裏

錦繡湖山落照中
河水南來非禹迹
冀方北去有唐風
溪城秋色催遲暮
愁對黃雲沒斷鴻

落日孤城動鼓聲
愁中畫角不勝吹
山川蕭瑟秋雲淨
草木凋傷暮雨悲
多病馬卿聊假日
數奇李廣不逢時
卷簾白水青山外
隱几無言有所思

搔首風塵雙短鬢
側身天地一儒冠
中原人物思王猛
江左功名愧謝安
首宿秋高戎馬健
江湖日短白鷗寒
金尊綠酒無錢共
安得愁中却暫歡

吳宮烟冷水空流慘澹風雲暗九秋禾黍故基曾駐輦
芙蓉高閣迥添愁繡楹錦柱蛟龍泣金沓瑤階鹿豕遊
宋玉平生最蕭索欲將九辯賦離憂

聞擣衣

露下碧梧秋滿天砧聲不斷思綿綿北來風俗猶存古
南度衣冠不及前首宿總肥宛騷裏琵琶曾泣漢嬋娟
人間俯仰成今古何待他年始惘然

題岳王墓

岳王墳上草離離秋色荒涼石獸危南渡君臣輕社稷
中原父老望旌旗英雄一死嗟何及天下中分遂不支
莫向西湖歌此曲水光山色不勝悲

溪上

溪上春風吹柳花溪頭春水淨無沙白鷗自信無機事
玄鳥猶知有歲華錦纜牙樯非昨夢鳳笙龍管是誰家
令人苦憶東陵子擬問田園學種瓜

次韻剛父無逸遊南山作

絕頂清秋凌翠烟
登臨應費酒如川
平生能著幾兩屐
負郭何須二頃田
初日出雲光射地
雙溪入湖波接天
升高望遠我所愛
青壁有路何當緣

次韻本齋先生即事

重攬衣裘敞更寬
徂年欲暮氣先寒
雨中百草難為綠
霜後黃花尚耐看
千古清真著舊傳
半生辛苦腐儒冠
便應築室山阿去
嘉與斯人賦考槃

次韻信仲晚興

蕭蕭殘照晚當樓寒葉疎雲亂客愁歲月蹉跎星北指
乾坤浩蕩水東流古來人物俱黃土少日心情在一丘
獨立無言風滿袖青山相對共悠悠

次韻王時觀

相思吳越動經年一見情深重惘然草木變衰人易老
江湖牢落鴈難前秦山半出青天上禹穴遙臨古道邊
欲說舊遊渾似夢何時重上剡溪船

紀舊遊

二月江南鶯亂飛百花滿樹柳依依落紅無數迷歌扇
嫩綠多情妬舞衣金鴨焚香川上暝畫船撾鼓月中歸
如今寂寞東風裏把酒無言對夕暉

次韻章得一同原父姪遊蘭澤

綠樹陰陰草接天已愁春盡更聞鶉落花飛絮都成恨
痛飲狂歌渾欲顛起舞有人如謝尚著書無意似伶玄
繡筵寶瑟何時會割錦纏頭不計錢

見章得一詩因次其韻

二首

水色青連月色黃
梨花淡白柳花香
即看時節催人事
更覺春愁惱客腸
無酒難供陶令飲
從人皆笑酈生狂
城南風暖遊人少
自在晴絲百尺長

片片花飛欲送春
萋萋碧草正愁人
黃蜂釀蜜經營急
紫燕銜泥來去頻
才似茂陵非晚遇
美如曲逆不長貧
久知求富都無益
但喜論詩若有神

奉和帥初雨中見贈

二首

陰雨淒淒生夏寒
故人望望惜清歡
停雲底事能相阻

后土何時可得乾無事甘為犀首飲切雲聊著屈平冠
閒門客散且高臥戶外泥深沒馬鞍

正坐清談與世違交情如子定應稀圖書跌宕心猶在
裘馬清狂意已非黃鶴未知何日返饑鳥故作傍人飛
谿南流水清如玉終擬歸休理釣磯

多景樓

層巔官閣幾時修遶檻長江萬古流白露已零秋草綠
斜陽雖好暮雲稠平南籌策張華得治內人才葛亮優

景物未窮登覽興
角聲初起甕城秋

東陽八詠樓

山城秋色淨朝暉
極目登臨未擬歸
羽士曾聞遼鶴語
征人又見塞鴻飛
西流二水玻璃合
南去千峰紫翠圍
如此山川良不惡
休文何事弗勝衣

送繆秀才教授真州

髯生別我將安適
言向真州作教官
但使清風生絳帳
何妨朝日照空槃
東園草木因人勝
北固江山隔岸看

才近中年已傷別可看南望送歸鞍

趵突泉

樂水發源天下無平地湧出白玉壺
谷虛久恐元氣泄
歲旱不愁東海枯
雲霧潤蒸華不注
波濤聲震大明湖
時來泉上濯塵土
冰雪滿懷清興孤

和鄭鵬南書懷

豈不懷歸苦未閒
宦情羈思不成歡
可能治郡如龔遂
只合臨流似幼安
棋局懶從先處著
醫方留取用時看

夜來夢到茗溪上一枕清風五月寒

題山堂

手選青松一萬栽山堂留得翠屏隈
推窗綠樹排簷入臨水紅桃對鏡開
山雉雖迎朝日去野禽啼傍夕陽來
老妻亦有幽棲意數日遲留不肯回

歲晚偶成

致君澤物已無由夢想田園雪水頭
老子難同非子傳齊人終困楚人咻
濯纓久欲隨漁父束帶寧堪見督郵

準擬新年棄官去百無拘繫似沙鷗

送瓜爾佳分省陝西

憶從長楊獵于時始識公堂堂九尺幹落落萬夫雄補
袞彌縫密能書點畫工勞謙延士類豈弟到兒童黃閣
歸人望青雲有父風驅馳常扈從奏對每留中暫輟尚
書履榮分陝右弓秦山依畫錦燕雪感秋蓬粉署趨承
舊瀛洲忝竊同因公動鄉思飛夢過江東

秋日即事

今日秋色好天高景不暄清飈動林薄涼意滿丘樊俗
客無因至幽禽時自言露濃金盞側香遠玉簪繁誰辨
東山妓空餘北海尊莫吟招隱賦桂樹可攀援

題太白酒船圖

載酒向何處稽山鏡水邊若為無賀老興盡便回船

長廊巖

脩岳如長廊下有流泉注山中古仙人步月自來去

玉簾泉

飛泉如玉簾直下數千尺新月橫簾鉤遙遙掛空碧

一線天

醺鷄舞甕中井蛙居坎底莫作一線看開眼九萬里

題孤山放鶴圖

西湖清且漣漪扁舟時蕩晴暉處處青山獨往翩翩白鶴迎歸

題王子慶所藏大年墨鴈

鴻雁栖栖遵渚黃蘆索索鳴秋羨殺承平公子筆端萬

里滄洲

清勝軒

小草幽香動碧池
暖風晴日長新萸
南窗書倚綠陰靜
聽盡行人過馬蹄

戲題僧惟堯墨梅

瀟洒孤山半樹春
素衣誰遣化緇塵
何如澹月微雲夜
照影西湖自寫真

題秋胡戲妻圖

相逢桑下說黃金料得秋胡用計深不是別來渾未識
黃金聊試別來心

絕句

春寒惻惻掩重門金鴨香殘火尚溫燕子不來花又落
一庭風雨自黃昏

簡王搏霄乞杏花

杏花枝上紅千葉偏得春饒惱殺人早與折來供一醉
東風如此恐成塵

金山

江水西來接太空中
流突兀湧鼇宮
妙高臺上一回首
看盡世途風浪中

題畫贈鶴皋

翠袖盈盈不受扶
天風縹緲降麻姑
便應從此東吳去
幾見蓬萊弱水枯

題孫登長嘯圖

在澗幽人樂考槃
南山白石夜漫漫
空林無風萬籟寂

長嘯一聲山月寒

李材

字子構京兆人年十七與趙承旨同遊海子上即事賦詩贈炙人口客有賦十月桃者材信口云劉郎再來歲云暮王母一笑天回春衆皆輟筆亦奇句也

縣瓠城歌

我經縣瓠城試作縣瓠歌殘灰五百載縣瓠失魏我有唐中葉失馭將退辱進危多詆謗淮西孽雛手指天百萬官兵不敢傍長安市上晝殺人司隸走藏魂膽喪晉

公一語破紛紜意斷心謀神莫抗諫書不到雙闕下詔
檢初成九天上煌煌日月煥斧節慘慘風雲動鞬韞殿
前虓虎神策軍勦武通顏分玉帳夜長雪花大如璧縣
瓠城頭血埋仗寒威方勁弓百鈞靜影不搖旗十丈已
囚契譙山更沸再戮鯨鯢海無浪蔡人不識緋衣兒劍
氣摩天大丞相方城大將拜道左犀甲金戈光炫晃兒
鬪狡衆五十秋白日青天破昏障兒童不遣避介冑婦
女爭來沽醪釀入朝論功功有差晉公之功無與讓英

雄事往名器虛粟斯嚙競相尚外藩跋扈驕將侮中
禁深巖嬖臣誑山東何啻百少陽秦苑洛陽隨板蕩我
歌縣瓠詞歌聲頗悲壯嗚呼唐之覆車將誰尤後人弔
古徒哀愴縣瓠城下汝水流縣瓠城邊牧笛唱縣瓠歌
歌已終君不見豐碑野火化為土悵望文公及晉公

過黃陵廟

黃陵廟前湘水綠天寒漁郎唱巴曲沙棠舟上月蒼蒼
翠蛟白蜃江茫茫似聞清愁五十柱萬里鴻飛楓葉暮

神鴉翻舞祠門開珠裳玉袖霑莓苔玄猿晝啼蘿薜影
赤鱗夜去芙蓉冷北渚淚痕斑竹紋南風哀思蒼梧雲
山頭古桂秋露碧山下江流豈終極荒涼揭車雜杜蘅
靈風自吹烟霧旌輕帆晚向芳洲泊聊薦蘋羞奠蘭酌
沅有汜兮湘有沱洞庭木落生層波裴回獨詠騷人歌

泊舟湘岾

長沙今在眼青草舊知名二月風檣疾三湘雪浪平藤
深帝子廟花發定王城莫艤江南岾啼鵲處處聲

遊山寺

行行行復止行到白雲間見客意不俗逢僧心便閒細
泉分別澗小逕入他山擬借禪房榻追遊信宿還

禁城秋夕

絳宮星淡海無波九陌猶聞動玉珂閭闔微雲藏夕漏
建章明月挂秋河此身天地流萍遠故國關山落木多
欲聽鈞天塵夢隔紫簫吹盡桂婆娑

元日賀裴都事朝回

海上瑤樓接五城。人間歌吹近蓬瀛。雲移豹尾旌旗動，
日射螭頭劍佩明。拜舞盡隨仙仗入，退歸遙認玉珂鳴。
欣欣百草含春意，得傍東君暖處生。

和王御史春懷

鶯啼燕語花漸稀。天明海碧涵晴暉。洛陽臺榭春色在，
山陰衣冠昔人非。夢雲何處讌瑤席，舞雪誰家裁紵衣。
獨有倚闌無限思，迢迢烟草暮鴻飛。

送省郎楊耀卿使雲南

飄飄使節出金閨
郭隗臺前暫解攜
天入五溪無鴈到
地經三峽有猿啼
子雲舊里風烟在
太尉家聲日月齊
後夜客槎何處望
秋河迢遞碧雲低

席上賦老松怪柏圖

仙人解衣盤礴坐
造化慘澹秋毫端
枝柯千仞入層漢
笙籟萬壑鳴驚湍
堂中日月不可老
壁上雷雨何時乾
我來醉臥北窗下
夢跨黃鵠天風寒

程鉅夫

名文海以字行其先徽州人叔父飛卿為宋建昌通判世祖時以城降鉅夫入為質子授管軍千戶每召問條對甚悉帝奇之授應奉翰林文字進修撰屢遷集賢直學士兼祕書少監至元二十九年奏陳五事多采行之賜第京師加翰林集賢學士二十四年立尚書省詔為參知政事固辭俄拜侍御史行御史臺事奉詔求賢於江南得二十餘人皆擢置清要二十六年入朝具疏力攻僧格幾危得免復還行臺二十九年召赴闕明年出為閩海道肅政廉訪使遷江南湖北道召拜翰林學士至大四年擢翰林學士承旨皇慶二年詔偕平章政事三月乞歸特授光祿大夫給驛南還卒年七十

追封楚國公諡文獻

緝熙殿御題紫薇花扇面壽立卿中丞

江南十里花茫茫紫薇書對中書堂天工會得無窮意
一枝宛轉留芬芳緝熙殿裏日月長御筆落處蛟龍翔
花前未覺風流遠扇底猶含雨露香烏府先生黃閣老
高敞新齋坐霜昊聊題此畫託千年從今永伴中書考

阿房宮

智力有窮天不老秦帝山河迹如掃參差忽落畫圖間
白髮朝臣驚欲倒咸陽初起阿房宮六籍已焚兵已鎔
渭水函關萬年固終南泰華五雲中複閣重樓鬱相望

翠幄橫鋪九天上上容萬人常有餘下建大旗知幾丈
霞騰霧散天日迷山童野耆民睽睽窮奢極麗猶未愜
謂海可梁天可梯蓬萊何處樓船遠上蔡東門歎黃犬
六國樓臺春草長千門歌舞斜陽轉遊觀未畢化埃塵
宮樹淒涼野鹿馴至今世上丹青手留與千年作諫臣
題李宗師所藏李仲實李雪菴趙子昂墨竹

李侯遊戲竹三昧葉葉枝枝分向背却憶王猷徑造時
一點清風驚百代雪菴筆力老且堅神藏氣密如枯禪

繁霜凋林雪積野虛空宴坐方寂然最後數竿更森竦
高節猶含老龍種一枝欲費百金求松雪道人世所重
二君一朝得三絕五月對之若冰雪我但從君覓竹栽
滿植中庭貯秋月

題許仲仁詩卷

殘雪詞林退食時小窗開卷鬢如絲音傳正始誰同調
氣逼元和稍自持文字不隨前輩盡風流却許後人知
霜清日冷梅花瘦獨對熏爐看欲癡

王結

字儀伯易州定興人徙家中山年二十餘遊京師
上執政書言時事聞者韙之仁宗在潛邸或薦結
充宿衛大惠十一年授東宮典牧大監仁宗即位
遷集賢直學士出為順惠路總管遷揚州寧國又
改東昌路至治二年參議中書省事泰定改元廷
試充讀卷官遷集賢侍讀學士除浙西廉訪使以
疾還歲餘拜遼陽行省參知政事文宗即位改陝
西明年拜中書參知政事被讒罷政元統初除浙
西廉訪未行召拜翰林學士知制詔同修國史歷
中書左丞至元元年詔復入翰林以養疾不能應
詔明年卒年六十二追封太原
郡公諡文忠有詩文十五卷

泗濱堂為蓋善長賦

乘槎河源崑崙高不極揚舲浮沅湘重華阻靈覲興
言遊汗漫千里一瞬息靈氛訢吉占歲宴果何適遙歸
泗水濱築堂俯晴碧優遊弦誦餘燕坐儼澄寂川流映
天光翔泳咸自得悠悠千載心寥寥竟誰識

遼陽高節婦

天東長白近蓬瀛縹緲仙人玉雪清鳳去紫簫聲已斷
青鸞獨跨上瑤京

宋元詩會卷七十一

欽定四庫全書

集部

宋元詩會卷七十二

詳校官中書_臣陸 湘

主事銜_臣徐以坤覆勘

總校官知縣_臣繆 琪

校對官中書_臣王 鍾泰

謄錄監生_臣張 鈞

欽定四庫全書

宋元詩會卷七十二

兵部主事陳焯編

李鳳

字翔卿東明人幼嗜學從鄉先生孫曼慶學詩詩
輒工長而究心伊洛之書至忘寒暑由廣平學正
除國子助教調臨朐主簿未久
即去官延祐八年卒子好文

睢陽懷古

睢陽城郭劫灰餘風景蕭條市井疎堤接汴梁分驛路

地連齊魯幾兵車張巡戰壘沙沈戟闕伯提封草滿墟
珍重開元遺寺在石幢猶刻魯公書

李昶

字士都幼穎悟過人讀書如夙習金興定二年同
父世弼廷對以春秋中二甲第二父三甲第三時
人以比向歆正大改元授儒林郎鄭州河陰簿調
漕運提舉元兵下河南奉親還鄉里行臺嚴實辟
授都事改行軍萬戶府知事已未世祖伐宋次濮
州召見問治國用兵之要條對甚悉上嘉納之及
即位眷遇益隆歷官翰林侍讀學士吏禮部尚書
年八十七卒所著春秋左氏遺意二十卷孟子權
衡五卷

寄王總管

華陽東下古梁州
五馬旌旗擁上游
腸斷寒江衣帶水
令人空望鎮南樓

過故縣埧

憲宗皇帝射臺高
氣壓蠻江萬丈濤
玉輦不歸巖樹冷
白雲何處醉蟠桃

張經

至元中官監察御史
歷湖北按察史

岳陽樓

巴陵形勝甲天下郡治西南有樓曰岳陽盡得巴陵之勝至元丙戌余以監察御史按臨長沙道出巴陵往返不暇一登甲午夏備員湖北憲司分司于辰始得以酬平昔之志噫湖山如此造物者何其靳耶因留數語以識歲月云

洞庭一水七百里烟朝月夕皆經過豈知斜陽萬里更有一佳處君山十二盤青螺乾坤有此樓萬古高嵯峨

憶昨長江咫尺限南北風烟畫本一日千摩挲今朝快
一登悅若驅沈疴生平所羨鑑湖清乃今更覺君恩多
湘靈也似知我至時令白鳥來婆娑鐵笛紫荊曲春草
黃陵歌江山一醉漫不省悲風落日生白波愛山愛水
亦非癖奈此日月如飛梭彭蠡銀山堆碧海青銅磨武
昌雲間歎黃鶴采石天外愁青娥詩家割據幾今古元
氣發泄天不訶扁舟歸來月一蓑僊槎已候三山阿吾
欲乘興觀銀河

富珠哩翀

字子暈其先隆安人祖惠從憲宗南征因家鄧之順陽以功封南陽郡侯父居謙辟掾江西以家自隨生翀翀父歿歸順陽復往江西從新喻蕭克翀學即勤學父歿歸順陽復往江西從新喻蕭克翀學克翀嘗夜夢大鳥止其所居出視之沖天而去明日翀至克翀為改是名蓋翀始名思溫字伯和也大應十一年用薦者授襄陽縣儒學教諭陞汴梁路儒學正會修世祖實錄姚燧首遂薦翀至大四

年授翰林國史院編修官延祐二年擢河東道廉訪司經歷遷陝西行臺監察御史五年拜監察御史除右司都事時相特們德爾專事刑戮翀因避去頃之擢翰林修撰歷國子司業自是外補內召皆稱其官文宗之入也翀建白近漢文故事上眷注呼子暈而不名久之廉訪漢中召僉太禧院遷

國子祭酒會命朝臣郊迎帝師翀獨平立不拜衆
為慄然元統二年參知江浙行省以遷葬歸鄉里
再召以疾辭卒年六十追封南陽郡公諡文靖有文集六十卷

范墳詩

宋蜀麗開國公范鎮景仁諡忠文盛德偉烈光著史
冊人固知之葬在襄城汝安鄉推賢里載東坡集中
甚詳襄城故隸汝州翀來訪問故老其墳儼然尚在
已為野夫豪農耕為禾黍之區矣范氏當金季猶有
居墳左者自經兵燼不知所存拊事歎閔故為作詩

以紀其概幸在官君子知其為先賢遺壠庶有以處之

忠文我睂英始也跡甚微堂堂薛簡肅旗隼西南飛其
人古廉守肯持鉤醬歸所得一偉人天下大布衣引以
賓王家光映春官闈昭陵宋仁主前星久無輝犯諱言
所難雷電每靈威雄哉鍊石手妙補天魏魏丞相江南
來雲掩扶桑暉舊德陳苦辭往往阨謗譏諸賢抗章疏
弱卒攻堅陴公力斡禹鼎正氣射黃扉荆舒憤至骨斤

語筆自揮贈之以蕙蘭何往無芳菲時公與司馬聲詣
玉琴徽解冠挂神武甘老西山薇九寓日督督赤子將
疇依兩公幸無恙起拯或庶幾嗣君元祐初痛洗前人
非民望屬司馬欲遜天為戰帝命起公臥門絕車馬駢
君實了吾事此外何所希清風溢寰海不啻嚴陵磯公
既晚家許道德人所師襄城卜封冢汝潁皆京圻我來
訪遺壠名姓存依稀雲仍散兵燼雨雪無留霏公名在
天下豈逐薤露晞誰能禁耕牧盛事為德基吾力不足

振感歎徒歔歔

閱故唐宮

錦佩走滅淮海波虬髯起操湯武戈盪民瘡痍六朝下
天開百二秦山河我來徬徨舊宮土細麥繁花忽誰主
終南王氣三百年僊李春風一千古春風吹夢天茫茫
玉樓金殿春風香開元舞馬散冥冥紆干凍雀含悲涼
世態倉皇幾烟霧秦漢英靈不知處崑崙河脈自西來
湘浦雁行令北去

鄧文原

字善之，綿州人。父璋，徙錢塘。文原年十五，通春秋。在宋時，以流寓試浙西魁。四川士至元二十七年，行中書省辟為杭州路儒學正。大惠二年，調崇德州教授。擢應奉翰林文字，陞修撰。謁告還江南，至大元年，復為修撰。預修成宗實錄，授江浙儒學提舉。入為國子司業。陞翰林待制，出僉江浙肅政廉訪。斷疑獄如神。至治二年，召為集賢直學士。明年，兼國子祭酒。泰定元年，充經筵官，以疾乞致仕。召拜翰林侍講學士，廉訪嶺北、湖南、道俱不赴。卒。年七十一。有文集及內制集若干卷，藏於家。

雨中雜興

窮巷積陰雨，離居寡歡情。安得塩埃風，逍遙余上征。長

日有逝川春花無晚榮永懷山澤居好遯潛英聲於陵
方濯園龐公不入城此意豈忘世咏歌以濯清令我夢
江國嗷嗷鷓鴣鳴不憂芳草歇但恐白髮生歸休企前
哲矢言著貞誠悠悠莫識察思子攜手行

題丁氏松澗圖

天目之峰凌紫烟下周林壑紆長川清池斗絕涵倒影
神運直自疏鑿先彼美幽貞廬閒房曲與辛夷荃蒼官
手植經幾年靈虬夭矯今參天門前朝流暮流水但聞

激石瀉瀨鳴濺濺山人養真衡茅下有書可讀琴可絃
意行清澗曲長嘯松風前山月出林高溪花弄春妍僊
人欲來夜將半天空鶴唳山淒然飈塵大笑狂馳子口
誦丹訣傳真玄我欲從之結隣屋得疏藥圃謀芝田

陪高彥敬遊南山

不到南山又二年離離秋草映寒泉東林蕭散開蓮社
西晉風流擢酒船古寺雲烟終日合長松風雨半空懸
謝公未了登臨興故向禪房借榻眠

都中送元傑道士南歸

授節僊山得過家都門津柳動春華還鄉近似千年鶴
奉使榮於八月槎古井雲封丹竈藥舊松風掃石壇花
道人冠劍鳴瑤珮豈必高車書錦誇

題小薛王畫鹿

禮樂河間雅好儒曾陪校獵奉鑾輿畫長靈園觀遊後
政暇嘉賓燕集餘蛺蝶圖工人去久騶虞詩好化行初
宗藩翰墨留珍賞憑仗相如賦子虛

題謝氏通濟橋

泠陽川上歷雲濤迴若僊山駕巨鼇
甃石不愁僧路滑傾金寧計鬼工勞
泛槎客去銀河近題柱人歸玉壘高
此地通津足佳興楚歌明月放輕舠

送李彥謙西臺

霜風十月長安道健鶻凌空淨羽毛
地控函關西極重星連執法太微高
鑄金古鼎奸先伏發刃新硎用欲韜
雅志澄清付公等我懷江漢放漁舠

送鮮于伯機之官浙東

衣冠文獻參諸老，臺閣功名負此公。
十載黃塵看去馬，萬山青眼送飛鴻。
揮毫對客風生座，載酒論詩月滿蓬。
昭代需才公論定，起分春雨浙江東。

送張綱父教官

我友白蘋洲畔客，忽凌風雪問征途。
南州歲晚尋高士，西塞烟深憶釣徒。
呼酒江船春水動，讀書山館雨聲孤。
無錢自愧蘇司業，聊賦驪駒為子娛。

送白君舉

崑崙西日水東溟何處清風起獨醒
遠道雲烟今古樹行人朝暮短長亭
草鋪平野春如剪花落重門晝自扃
不有茅茨容嘯傲終南山色為誰青

正旦有感

干戈短景去匆匆回首南朝已夢中
世事盡隨天道北春正依舊斗杓東
一時玉燭堪調燮萬國車書想混同
寂寞荒山老松樹看渠梅柳競春風

清明省墓

短櫂吳歌花滿川
春帆愁斷蓼莪篇
小溪蘋藻塋間祭
春雨桑麻墓下田
黃壤有靈終異土
青山無樹半荒阡
傷哉巴峽松楸路
孤兔蒼寒六十年

奉題延祐宸翰

有序

欽惟仁宗上承祖武
蒐羅俊彥求治匪寧
尤尊禮儒臣務敦風
化由是治書侍御史
臣郭貫擢禮部尚書
凡在選者六人惟貫
進秩有加親灑宸翰
昭示龍光

忝備臣僚咸增鼓舞集賢直學士臣鄧文原謹拜手
稽首而作詩曰

宵旰需賢表薦紳秩宗首選贊華勛官聯天府璇璣象
帝闡河圖琬琰文曾聽簫韶瞻曉日仰攀弓劍泣秋雲
小臣作頌稱仁聖湛露承恩未足云

送姚利用入京

雪晴川淨駕飛輓舟入河冰二月開壯士不緣彈鋏去
故山曾見爛柯來上林淑氣催花柳盛代英雄擢草萊

青眼諸賢如問訊為言衰病懶登臺

子昂畫馬

奔騰駿骨雲路長
蕭灑神鬃風露涼
沙場春牧草肥雨
野徼秋嘶楓隕霜
三關戰士黃金甲
五陵俠客紅絲韁
朝羈暮絡祇腸斷
華山烟樹遙蒼蒼

題陶淵明像

詩中甲子春秋筆
籬下黃花雨露枝
便向斜川頻載酒
風光不似義熙時

尚野

字文蔚滿城人幼穎異祖母劉厚資之使就學至元十八年以處士徵為國史院編修兼興文署丞出為汝州判官遷南陽縣尹改懷孟河渠副使大惠六年遷國子助教陞博士仁宗在東官野為太子文學多所裨益至大元年除國子司業四年拜翰林直學士知制誥同修國史皇慶元年陞翰林侍講學士延祐初改集賢侍講學士兼國子祭酒移疾歸卒年七十六追封上黨郡公謚文懿

淵明歸來圖

羲皇上人鄉里兒田園將蕪非所思楚聲雖託絕怨懟
高情千古歸來詞歸來忽復河山移忠憤意切語益微

白雲遙遙望不極東籬舊菊西山薇夷齊奚疑怨耶非
况乃貌此遺世資文行圭璧照方冊飄然髣髴空同時

盧亘

字彥威武宗朝知
制誥有含雪集

送鄧善之提舉江制

四首

春秋嚴筆削凜若執玄鉞君獨抱遺經結髮飽剗劂明
剖是非心微探義理窟下視羣兒愚爭端王正月竭來
奮直筆浩然心思竭王功與帝德昭昭日月揭胡為厭

詞林擬欲觀溟渤榮華若浮烟汗簡青不滅

離離天星高皓皓雲月光候雁過楚澤蟋蟀鳴中堂天
時諒難測徒然多感傷念子去意遠沈憂結衷腸憶昔
初奉歡露白春蘭芳清尊罷新製妙趣深濠梁飛景急
西匿川流浩蕩蕩玄髮淒歲晚不脫天雨霜蔓草豈容
惜松柏在高岡

賜谷上寒日影射扶桑枝瞬息及中天流光迅難持人
生百年內昂昂何所施孤鴻東南征浮雲西北馳可憐

萬感身會合須臾期安得弄明月皎皎遠憂疑折花笑
蓉浦蕩槳江漢涯優游以卒歲身名良不墮

遊雲蒼鱗窮閭闔不可斗徒令虎豹關日月近輝耀濛
濛八表塵隱隱萬景竅泯然一歸途伊誰執其要栖栖
聖哲徒禮樂懷窈眇閉門忍朝饑風雨深蓬蓼今年江
海去光景短螢爝禾黍滿故墟閭巷餘返照揮絃送飛
鴻古今入長嘯

過黃陵廟

此詩已見李材集中而潘選復屬盧亘
姑兩存之然李多遊湘南作則題黃陵

廟固其
宜也

黃陵廟前湘水綠天寒漁郎唱巴曲沙棠舟上月蒼蒼
翠蛟白蜃江茫茫似聞清愁五十柱萬里鴻飛楓葉暮
神鴉翻舞祠門開珠裳玉袖霑莓苔玄猿晝啼薜蘿影
赤鱗夜去芙蓉冷北渚淚痕斑竹紋南風哀思蒼梧雲
山頭古桂秋露碧山下江流豈終極荒涼揭車雜杜蘅
靈風自吹烟霧旌輕帆晚向芳洲泊聊薦蘋羞奠蘭酌
沅有汜兮湘有沱洞庭木落生層波裴回獨咏騷人歌

和春詩

鶯啼燕語花漸稀
天明海碧涵晴暉
洛陽臺榭春色在
山陰衣冠昔人非
夢雲何處燕瑤席
舞雪誰家裁
獨有倚樓無限意
年年烟草暮鴻飛

鮮于樞

字伯機中歲刻苦讀書因號困學官太常以詩翰
名世元史職官儒學皆不載而藝林盛傳其人嘗
書幅云登公卿之門不見公卿之面一辱也見公
卿之面不知公卿之心二辱也知公卿之心而公
卿不知我之心三辱也大丈夫寧甘萬死不可
一辱其風致如此子必仁字去矜亦有才名

感寓 六首

吾愛東方朔高揖金馬門向非玩六合安肯來崑崙昂
昂九尺身談辯黃河翻誰知上書意蛾眉非自婚不見
馬相如俛首狗監恩人生非桃李何故不自言

吾愛李太白玩世如游龍自知天上謫何必人間容海
風吹綠髮蕭蕭臥雲松我昔夢見之遺以金芙蓉清輝
怪在眼月落峨眉峰

春風如綠波淡蕩浴楊柳高樓語錦瑟落花泛樽酒何

人白鼻騮蒙茸紫貂袖一字或未識銀章縣兩肘煌煌
貝宮珠迺落緯蕭手誰知草玄者窮巷閉白首

宇宙忽空濶飲馬萬里流平生負兩眼及此行寓州天
清健鶻運木脫饑鷹投長風吹海雨濯我紫綺裘相逢
半遊俠把酒髯如虬慷慨說史記歷今山川秋向來衣
帶水日短河無舟

西風桂花落我上天台山僊子扶我手冷然蒼水環乘
鸞者誰子飛烟渺難攀三生此遊戲弄影銀河灣空山

忽飛瀑四顧鳴潺湲長揖馬子微此豈非人間

船頭書千乘船尾酒百壺酒盡書在眼落月如明珠忽
悟八陣法縱橫如河圖惜哉經世士未肯窺唐虞季子
相六國所見惟陰符

以上感寓詩潘是仁編為丁鶴年作凡六首而元音
僅錄三首以屬鮮于樞未知孰是然近日錢氏列朝
選中所載元末丁高士詩甚夥未嘗及此詩一句則
六首皆鮮于作元音特選其三耳

過桐廬漏巷灘

驚流激長灘百折怒未已
篙師與水爭退尺進纔咫
技窮解衣下力排過乃止
維時春冬交冰雪寒墮趾
我時卧舟中起視顙有泚
迂疎一何補辛苦愧舟子

水荒子歌 二首

水荒子日日悲歌向城市
詞危調苦不忍聞妻孥散盡
餘一身城中米貴丐者衆
崎嶇一飽經千門城中昔食
城外米城外人今食城裏
耕者漸少田漸荒政恐明年

亦如此水荒子行歌乞食良不惡猶勝弄兵獄中死

水荒子聽我語忍死休離故鄉土江中風浪大如山蛟
鱷垂涎寧貴汝路傍暴客掠人賣性命由他還更苦北
風吹霜水返壑稍稍人烟動墟落賑濟欲下逋負除此
著當年苦為樂水荒子區區更弊何時無及早還鄉事
東作

湖上曲

荆省廣濟庫每歲用富戶司出納延祐間有富戶侵用官錢莫償者府判王某素殘

忍乃拘繫其妻女以小舟載之勒趣遊客于西湖收纏頭入官鮮于伯機感作是詩

湖邊蕩漿誰家女綠慘紅愁問無語低回忍淚並人船
貪得纏頭強歌舞玉壺美酒不消憂魚腹熊蹯棄如土
陽臺夢短匆匆去鴛鴦鎖生寒愁日暮安得義士擲千金
坐令桑濮歌行露

退宮人引

駝絨繡帽紅顴頰素髮微連細紗結出宮嫁作海商妻
裙腰尚帶河西摺少年十五二十時中官教得行步齊
春羅朝剪繡花帖堦前夜舞高變麗寵姬當前翠衿小

便覺中原美人少金蓮斜抱捧珠龍玉籠倒挂收香鳥
年年宮中春日長小車銀甕蒲萄香香殿吹簫鳳皇語
一日再宴諸侯王舞困樓蘭過三十內家別選蛾眉入
雖名伴送半無家旋賣珠環問親戚一為商婦始自憐
十年不見回番船多年不記教坊曲時時尋撥相思絃

題董北苑山水

愛山不得山中住長自空吟憶山句偶然見此虛堂間
頓教還我滄洲趣陰厓絕壑雷雨黑蒼藤老樹蛟龍怒

岸石聲確溪澗濶知有人家入無路一重一掩深復深
危橋古木依雲林是中宜有避世者我欲徑去投華簪
源也世本膏粱子曾中丘壑肯如此後來僅見僧巨然
筆墨雖工氣難似想當解衣盤礴初意匠妙與造化俱
官閒飽飯日無事吮墨含毫時自娛誰憐齷齪百僚底
雙鬢塵埃對此圖

建德溪行

山截溪將斷川迴路忽通鳥飛青嶂裏人語翠微中玄

圃參差是桃源想像同平生苦行役翻愛石尤風

題許仁仲卷

殘雪詞林退食時小窗開卷鬢如絲音傳正始誰同調
氣逼元和稍自持文字不隨前輩盡風流只許後人知
霜清月冷梅花瘦獨對熏爐看欲癡

石橋山留題

旁通日月上星辰有路遙應接玉京僊奕未終人物換
秦鞭不到海波平當時混沌知誰鑿他日崆峒強自名

枯樹重榮事尤異欲從樵者問長生

遊智者寺

四圍松是祇園樹三面山開舍衛城遊子心隨仙境化
老禪詩似石根清幾人邂逅有今日半載超超成此行
安得盡拋身外事長年來此學無生

袁楠

字伯長慶元人為童子時詩已著聲大惠初闔復
程丈海王構薦為國史院簡閱官陞應奉翰林文
字同知制誥兼國史院編修請購求遼金宋三史
遺書歷兩考遷待制拜集賢直學士移疾去官未

幾復以原官召入改翰林直學士知制誥同修國史至治元年遷侍講學士泰定初辭歸楠在詞林朝廷制冊多出其手所著有易說春秋說清容居士集卒年六十一贈中奉大夫追封陳留郡公諡文清○按元明善為袁夫人墓誌袁四明人家世通顯楠四代以上皆宋大臣

飲酒雜詩 五首

春至舊疾作晝眠聽禽聲總角耽六籍萬化何縱橫觀象太極初始悟無虧成環中秘靈根羣動一以貞吾欲乘彩鳳截篴吹為笙上窮崑崙渾下探渤澥清

京師二十載酒中有深歡大雨即閉戶朔風常解鞍客

至輒笑之是豈宜居官振容筮神著鴻飛漸于磐百歲
苦世短萬鍾非我干所以東方生吏隱神益完

陽烏乘南雲飄飄振奇翮迫此梁稻謀居移遂成客愧
我食京塵誓墓志未獲雙峰十丈松下有千載魄當年
侍蓬瀛香芸森寶冊高齋集遺編朱墨猶手澤戰兢愧
匪承永念在行役

少欲觀滄海下取珊瑚枝穹龜負玄文靈鱗揚朱鬐盪
舟不能往寶氣時紛披有客方壺來授簡雲差差一以

參太極九以師庖犧振衣海神泣舉觴山鬼移載觀五
嶽形五性各有殊神州養深知百靈受驅馳申申安樂
翁定洛為中居神京屹金臺五雲玉芙蓉始知天經旋
積氣為堪輿

嵯峨白雲阡種松在山腰散之不盈掬離離如麥苗迎
陽漱靈津參差拂雲霄露重碧天淨玄鶴時來巢俛仰
二十年鬢齒日以凋寄聲謝玄鶴相期躡崑堯

次韻虞伯生夜坐

炎晶爍草露木末望西顓靜躁誰為尸翕忽紛寸抱志
士法天運炳燭不在老羣經固其郛積神以為寶陋彼
多言生希名太玄草山林詎心違歲月付幽討擾擾徒
為名努力在此道

度淮寄養浩

竹清寒房靜殘月在西壁悄悄燈景微尸坐棄枕席井
華飲蟾蜍玄雲成五色明知非世謀精詣在六籍我行
長淮浪凍樹挾春碧夢子白紵寬雙眸炯空激書來屢

在手此意何的的數面不成歡遠別迺復惻歸雁臨風
翔先之寄深臆

懷伯生

春雨消路塵春風散林纈蕩蕩長安門客子千萬轍城
陰有一士淡食羹不啜采彼松上露煮石化晴雪沈冥
獲真性觴至那復說向來古本談今作耳根熱維南有
樛枝茁溜滋百結在德良自防居屯詎為折念之長夜
深寒光吐殘月

史氏報春堂

白雲在屋角
凱風生樹端
下有慈竹叢
低昂候平安
盈盈玉雪母
光若赤瑛盤
朝奉鶴禁恩
暮承龜臺歡
教兒誦經史
清言消綺紈
築堂深且明
朱光映庭蘭
寸心諒匪石
寵辱非所干
世故疾危岌
奉盈身愈完
願言樹明德
朝夕應加餐

煮茶圖一卷倣石窗史處州燕居故事也

石窗山樵晉公子獨鶴蕭蕭烟竹裏
月湖萬頃碧瑤璃

高築虛堂水中止堂深六月如深秋萬柄風搖紅旖旎
遵南更有山澤姿對面晴峰插天倚憶昔王門豪盛時
甲第如雲總朱紫曉趨黃閣袖香塵俯首脂韋喪厥美
一官遠去長安門德色欣欣對知己豈如高懷脫榮辱
妙出清言洗紈綺郡符一試不挂意岼幘看雲卧林墅
平生嗜茗苦有癖古井汲泉和石髓風回翠碾落晴花
湯響雲鎗滾珠薤齒寒意冷復三咽萬事無言歸坎止
何人丹青悟天巧落筆毫芒研妙理黃梁初炊夢未古

舊事淒零誰復紀
展圖縹緲憶遺蹤
玉佩珊珊響秋水
送蘇子寧赴嶺北行省郎中 二首

貂帽護寒沙
冰天閱歲華
斷溪駝聽水
密雪犬行車
雲盡難尋雁
春深不見花
昔人奇絕處
八月解乘槎
往歲經遊地
寒蕪碧燐深
雲開山後陣
水咽隴頭吟
雪白羶房重
天青羽檄沈
重華新雨露
悲喜候車音

書懷寄從子瑛

越公舊築鄞江宅
風捲飛花劫火新
子竟尋真餐白石

我方修史玩青春金張螭綬元欺世王謝烏衣亦可人
誓墓政須堅晚歲雙峰擁髻碧嶙峋

次韻天童岫禪師

太白峰高積翠明老禪的的寄深情相思沙磔惟懷瑾
獨立鄉臺近子卿舊業久荒松露立浮名空眩槿朝榮
定須結社修真隱寒月深燈了梵經

送雪竇長老校經回里

翠鎖公關疊疊高坐看明月負金黿已將禪板傳心印

暫下繩牀衣毛袍聖諦無聲機獨露經筌有誤目難逃
塵中白髮誰消得歸掩山寮聽雪濤

五月二十日甘雨如注江南呼為分龍雨

平時龜坼禱龍君百頃青黃兩界分
匝岬已霑三尺雨
隔溪惟見一川雲誰家襖襖涼如水
此地祇凋火欲焚
共道神功有南北老農元不廢耕耘

送華山隱者

黑髮詞官佩水蒼萬松深處響琳瑯
黃柑有法能為酒

紫朮無饑可代糧招鶴舞空山月冷檄龍吹雨海風涼
瑤池欲問長生訣碧澗研朱寫綠章

次周侍御回朝

蛾眉班肅整皇皇匝松陰陋午光舞翽當軒催進酒
冊函登陞促傳香六龍捧御雲中日三象輸琛海外洋
欲識兩宮清淨理熏風殿角漏初長

碧筍飲

甘露無聲墜玉盤中天飛影動琅玕壚頭太白塵埃熱

石眼空青冰雪寒
水池尾閭來瀚海
手扶砥柱障狂瀾
麴生不用忙傾蓋
吸盡清香見肺肝

寄子昂

故國王孫佩楚蘭
春雲涼月倚朱欄
玉簫曲趁鶯聲轉
金鼎香隨蝶夢殘
碧沚波清堪把釣
黃塵風急倦彈冠
外家文物惟君在
笑我冰姿跨曉鞍

送王繼學

二首

王京高處雪流脂
連插雞冠綠鬢垂
蹀躞有泥歌獨漉

琵琶無夢說相思黑河舊樂催填譜白海名花擬進詞
羽獵上林俱罷賦卿雲何以報明時

淺波平疊磧漫漫拂嶺青帘罨畫看氍毹起營羊胛熟
土房催頓馬捫乾祠宮走驛傳金椀冰正分奩貯玉盤
莫上鄉臺望南北白雲微處是長安

觀物

黃河不信從天下濟水那知有伏流自古乾坤合神化
空將簡牘費冥搜張華博物身終死鄒衍談天舌竟休

我亦從今銷綺語春風碧眼玩沙鷗

寄開元奎律師

雙塔亭亭透夕陽芭蕉深處碧窗涼江神夜聽光明偈
天女朝分解脫香齋鉢午空烏守樹經堂雲冷鶴歸房
平生欲結西方社似笑淵明作吏忙

無題次馬伯庸韻

四首

金縷歌殘月滿江玉顏曾憶侍油幢象牀雲重恩專一
鯨錦波翻賜疊雙春淺正宜羶作幕夜涼深恨魀為窗

浣紗可是無虛匹側足寒溪澣石宗

翠簾匝匝護朱光千葉宮桃滿院香閨苑有鸞通尺素
虛橋無鵲寄流黃上林賦罷歸已蜀興慶詞工謫夜郎
不是月中親度曲世人那解聽霓裳

相期來似石城潮日望晴虹結綵橋却月睂愁歌漸遠
凌波步近意非遙抽琴有恨迴青角疊袖無塵轉綠腰
美玉最憐隨鳳去秋來誰與伴吹簫

白髮詞臣兩耳垂華腴堆笏陋牛醫宮娥引燭催麻日

院吏傳更寫制時蠟撚化生秋夕賜翠標疊勝歲華移
低頭欲說唐朝舊願侍虛皇進玉卮

以上八首潘是仁編為貫雲石作曹選於袁貫兩存
之然考次伯庸無題詩在文類中久已屬袁其餘皆
袁作無疑矣潘編多耳食附會而能始亦草率如此
豈未讀文類耶

翰林故事莫盛於唐宋聊述舊聞擬宮詞

五首

禁鐘初動趣傳宣衣袖薰香到御前漸近宮門扶下馬

內官分引導金蓮

御筆圓封草相麻龍箋香透擁金花儀鸞敕設庭前候
賜酪方終更進茶

制草塗鴉未敢刪內璫宣引侍龍顏已分筆格金蟾滴
更賜端溪紫硯山

春帖分裁閣分多宮娥爭餽纈綃羅青絲菜餅銀盤送
幡勝新題墨旋磨

清馥香溫玉酒卮祝文新撰報都知夜來奉旨傳丞相

五朶雲濃押省咨

葛僊翁移居圖

翁媼相攜入翠微
轉頭猶有可憐兒
丹砂不是神仙藥
勾漏歸來鬢已絲

宮女度曲圖

望瀛法曲紫霞觴
更按伊州奉玉皇
翠竹涼深宮院密
新聲那得過宮牆

同 怨

字寬甫其先太原人後遷秦中奉元祖昇父繼先
皆博學能文恕安靜端凝羈州如成人年十三以
書經魁鄉校仁宗踐阼即其家拜國子司業三召
不起陝西行臺侍御史趙世延請即奉元置魯齋
書院中書奏恕領教事制可之延祐設科再主鄉
試人服其公致和元年拜集賢侍讀學士以老疾
辭恕家無儋石儲而聚書數萬卷扁所居
曰槩菴卒年七十八有槩菴集二十卷

愁

來時容易去何遲
半在胸中半在睂
門掩落花春去後
窗涵殘月酒醒時
濃如野外連天草
亂似空中惹地絲
除却五侯歌舞地
人間何境不相隨

程文

字以文徽州人平生介持以著述為事不事造請
年踰六十始擢國史編修官調國子助教拜南臺
御史遷禮部員外
郎有集三十卷

送文仲德之臨洮帥府經歷

吾聞洮州綠石堪為硯能淬筆鋒如淬劍地靈天寶愁
鬼工埋沒塵沙羞自獻羌童目悍手足鮮挂弓走馬唯
臨邊雄藩令嚴烽燧息鼓角畫靜旌旗縣幕官姓文不
好武要使西羌化東魯詩書盈案夜生輝親寫封章上

天府豪猪之靴青兕裘時平不願萬戶侯但得洮州綠
硯石歸來泚筆立螭頭

歲寒問答辭

二首

松柏杉何槃槃毫末小排雲端不作梁柱守歲寒曾不
如桃李花朝榮暮謝得實升金盤昂藏千百年一待鳳
與鸞

松柏杉何槃槃古來材大用則難君勿言時則然受命
既獨賦性偏高枝中梁柱小枝可以為車船材見識全

吾天鳳鸞不巢且任百鳥喧寧同歲寒老不與春風妍
君勿言時則然大匠一過肯棄捐

高克恭

字彥叔房山人
官尚書善繪事

題道院 二首

綠陰無際壓蒼苔為愛幽深手自栽風月早知煩耳目
不教春筍過牆來

草色琅玕逼兩楹蚤陰才過午陰清斜陽又送西軒影

一枕移牀待月生

無錫山中留題

山深自昔無車馬道在何曾畏虎狼
祇恐閒人來看竹淋漓醉墨污新牆

即事

古木陰中生白烟忽從石上見流泉
閒隨屈曲尋源去直到人家竹塢邊

過弋陽

雷聲驅雨過山西山腹雲根似削齊日暮牧兒歸不得
料應白水漲前溪

過信州

二千里地佳山水無數海棠官道傍風送落紅攬馬過
春光更比路人忙

宋元詩會卷七十二